

Gobierno cla pa intermedia den conflicto di carnaval

ORANJESTAD – Den cuadro di conflictonan cu ta tumando luga entre SAC y gruponan di carnaval, gobierno lo intermedia pa asina bin cu un posibel solucion. Segun Minister di Turismo y Cultura Otmar Oduber, e kier bay na e raiz di e conflicto y wak si mester reforma e organisacion di carnaval. Minister a bisa Bon Dia Aruba cu e no kier duna mucho comentario ariba e situacion, mirando cu e no kier mescla su posicion di minister y su interes como lider di grupo di carnaval Touch Of Brazil (TOB). Pesar di esaki el a logra haci un par di declaracion bastante concreto.

Les a detayenan riba pagina A2



Minister Oduber:

'Gobierno cla pa intermedia den conflicto di carnaval y trece cambio'

ORANJESTAD — Mirando e conflicto cu tin andando entre SAC y gruponan di carnaval, na unda no menos cu cinco grupo grandi a indica cu nan lo no participa mas den carnaval, gobiernu ta muestra di bay hunga un rol activo den un posibel solucion. Minister di Turismo y Cultura Otmar Oduber a duna di conoce ayera mainta durante un conferencia di prensa cu e kier bay na e raiz di e conflicto y wak si mester reforma organisacion di carnaval na un nivel cu ta cuadra cu e tamaño y importancia economico di e evento aki. "Nos lo bay dune su atencion. Nos a medio comberse cu SAC caba. Nos a medio comberse cu Musica y nos a comberse cu e seis gruponan di carnaval cu a acerca gobierno recientemente.

Mi ta kere cu e di 60 aña ta un bon momento pa un evaluacion tuma luga, pa wak ki direccion nos carnaval lo bay tuma den proximo añanan", asina minister Oduber a conta Bon Dia Aruba ayera net prome cu su vuelo pa Merca a sali. Durante conferencia di prensa mas prome den dia, minister Oduber a indica na prome instante cu e no kier a duna mucho comentario ariba e situacion, mirando cu e no kier mescla su posicion di minister y su interes como lider di grupo di carnaval Touch Of Brazil (TOB). Pesar di esaki el a logra haci un par di declaracion basta concreto. "Mi ta kere cu nos mester bay na e raiz y mira cu si e organisacion di carnaval den su totalidad ta funciona manera e mester funciona pa

un tamaño y nivel di carnaval cu nos tin den momentonan aki. Mi ta kere cu unabes nos analisa esaki y cu por tin e transparencia necesario cu tur hende por ta satisfecho cun'e, lo bo haya un actividad economico den cual tur hende ta sinti nan mes mas confortabel", asina e mandatario y awo lider saliente di TOB a duna di conoce. "Mi sa e dolornan cu ta biba cerca mayoria di e gruponan y cerca mayoria di e bandanan tambe y mi ta kere ta yega e momento cu na un nivel di maneho mester atende e ora cu e organisacionnan na un forma hopi serio, si nos kier mira nos carnaval continua cu e splendor cu nos conoce." Minister Oduber a bisa cu den su capacidad como minister e kier atende cu na un forma structural cu asuntonan cu actualmente no ta bayendo corecto. E mandatario a muestra ariba importancia economico di carnaval pa henter comercio di Aruba. Bisando esaki, minister Oduber ta muestra di ta na banda di e gruponan di carnaval cu ta exigi mas transparencia financiero for di SAC. Bon Dia Aruba a puntra minister Oduber si Carnaval di Aruba lo por mira un futuro den cual no Stichting Arubaanse Carnaval, pero e gruponan mes ta maneha e evento. "Esey ta depende di e gruponan di carnaval. Tur club mester miembro y tur stichting mester di hende pa sostene."

Placa di gobierno pa gruponan

Un factor interesante den cual SAC y e gruponan ta pega na otro ta e placa cu



gobierno a pone disponibel pa paga bek gruponan di carnaval pa nan gastonan den Carnaval 60. Ciertu sumanan a bay caba na Stichting Musica y SAC pa organisacion di Soca & Caiso Monarch y Festival di Tumba.

Gruponan por haya ainda un maximo di 5.000 florin pa nan participacion, pero mester cumpli cu cierto condicionnan si pa loke ta entre otro cantidad minimo di hende cu a participa den grupo, uzo di carosa, participacion den eleccion di reina y prins cu pancho. SAC ta esun cu ta controla e condicionnan aki y ta raporta na gobiernu pa esaki pasa e suma entre 0 y 5.000 florin (dependiendo di cuanto condicionnan a cumpli cun'e) pa e gruponan. Papiando cu Bon Dia Aruba, minister Oduber ta bisa cu

SAC te ainda no a duna un lista na gobiernu.

Fin di TOB

Oduber mes a indica cu TOB ta stop como grupo ya cu e y su señora esposa despues di 15 aña kier dedica mas tempo na famia. Ambos tin trabounan hopi pisa y hecho cu tin un yiu chikito di un aña y mey den famia ta hunga un rol, segun e mandatario. Lidera TOB, cu pa ultimo 10 aña tabata e grupo di carnaval mas grandi na Aruba, ta resulta di ta hopi pisa. Banda di esey tin otro motibonan pa stop pero cu minister Oduber lo bay divulga na un ocasion mas apropiada, asina e ta duna di conoce. E minister y su casa lo sigui si como participantenan den otro grupo di carnaval. Oduber ta bisa cu te hasta nan a dicidi caba cua grupo nan lo join otro aña. □